

粵

海

關

志

粵海關志卷二十九

夷商四

澳門同知王衷駁西洋國使啣嚙噤噤吃

架啼嚙哆吐喱喊噉議

嘉慶十五年八月

一據稟舊例西洋夷人上省置辦貨物料理貿易事宜祇經唛嚙哆代稟澳門關口即可放行並無批照求飭照舊章承辦據府廳議查夷人上下省澳向由洋商稟明粵海關衙門批照俾沿途各衙門得於稽查於乾隆五十

四年經澳門同知侯丞稟請夷人上省由該同知衙門給照辦理更爲周密又於乾隆五十九年開該同知章丞具稟夷人上省亦照下澳之例仍令行商就近稟請粵海關衙門給照庶稽查周密茲該夷稟請由澳門關口准照放行則沿途各衙門並無文檄行知憑何稽察夷人上下省澳關係非輕倘有疎虞轉非設立澳防同知專司稽查之本意嘉慶十二年據夷官唛嚟哆具稟業經會議前例

永遠遵行未便妄請更改今所請礙難准行
一據稟俯念澳夷無田耕鑿准設二十五號洋
船往來貿易營生以資養育彼時人口未獲
盈千今生齒日繁男女計至五千餘衆且因
近年外國打仗來往艱難竟至衣食無資乞
再添船二十五號俾得源流貿易藉以養生
准粵海關及府廳查澳夷趁洋船隻始於雍
正三年經總督孔毓珣題奉部咨定以限制
誠恐夷船日多來者日衆請將彼時現存洋

船二十五號編列字號作爲定額只准修葺補額不准額外添置推原昔日立法之意誠恐船多人衆或致滋事生端嘉慶十二年據夷官唛嚟哆具稟業經會議此洋船二十五號係久經題定額數未便無端添設今仍請添造礙難准行

一據稟澳額船鈔昔蒙恩例准照東洋船例征輸曾有設立碑牌永爲垂誌今將鈔白呈查應奉新例征輸等語并該夷續稟前由今移

准粵海關查覆澳夷洋船如新船頂額卽照

東洋船例丈量長闊相乘至一十五丈四尺

以上作爲頭等每尺鈔銀六兩二錢二分二

釐二毫二絲二忽長闊相乘至一十五丈四

尺以下作爲二等每尺鈔銀五兩七錢一分

四釐二毫八絲五忽長闊相乘至一十二丈

二尺以下作爲三等每尺鈔銀四兩並無四

等船例另收澳例新船規銀七十兩次年原

船回澳卽照本港船例丈量長闊相乘至一

十六丈零作爲頭等每尺一兩五錢長濶相乘至一十四丈作爲二等每尺一兩三錢長濶相乘至一十丈零作爲三等每尺一兩一錢長濶相乘至八丈者作爲四等每尺九錢如相乘數目有不相近者稟明以兩等船例對報另收舊船規銀三十五兩如外來洋船不論初來再來俱照東洋船例輸鈔另收澳例規銀七十一兩再澳例係收十字花銀應照庫平兌收每兩一兩另補水銀八分歷久遵

行遞年由粵海關衙門入冊報部在案並無
現增新例毋庸另立章程嘉慶十二年據夷
官倭塚哆具稟業經議覆今應遵照舊章辦
理毋庸改議

一據稟洋船壞漏必須修葺雇用工匠之人免
其稟報不致申通衙差弁役藉端需索准粵
海關查覆夷船大修例收歸公銀二十四兩
小修收歸公銀一十二兩向有一定數目繳
存關部衙門報部未便免其稟報以致歸公

銀兩無著

一據稟凡有紅單鹽船經由寄碇者飭定停泊
娘媽閣口外分列兩傍無許擁進內河將責
載沙石填塞海道且至洋船歸港稍有挾碰
動輒生端行據府廳查覆紅單鹽船閉有搭
帶零星貨物在該處交易由來已久未便遽
行斥禁如只寄碇船隻灣泊內地誠恐勾串
土人載運夷貨出洋走漏稅課應請飭令灣
泊娘媽閣口外不得入口以昭慎重嘉慶十

二年據夷官委喇咳具稟業經會同該道照舊
章辦理在案今應仍照舊章辦理其庸另議
章程

一據稟白鉛一項原係西洋傾銀鑄器必用之
物且合洋船資載最善之資向例俱准澳船
裝運出口近因新例遞年限以七千擔出洋
緣額數無多俱係黃埔別國洋船蓋額購買
出口以致西洋等埠需用艱難求恩給澳門
遞年限以三千擔爲度俾澳船得以裝運回

洋准粵海關及府廳查覆白鉛一項爲內地
鼓鑄必需之物先經前憲會同關部奏明每
年限以七十萬斤爲率續奉

聖諭令大加裁減或竟可不令放運出洋查明設禁亦
無不可等因欽遵在案是前定七十萬斤爲數已多
難以再行加增所有買鉛章程前經議令洋
商在佛山收買若干由佛山同知查明斤兩
填給印照運至省河復赴南番兩縣驗明截
角申報關部衙門覆驗無異始准夷人分裝

出口查辦最爲嚴密。況澳夷購貨向無行商承報。茲據稱每年乞准買運。若如所請。則一切無所責成。似非前議立法防弊之本意。如果該夷必須白鉛。應令該澳夷卽照外洋買鉛之例。自投洋商報明收買。應由佛山同知及南番二縣並粵海關衙門遞相稽察。以免日久弊生。致滋浮買透漏之弊。

一據稟澳夷設立安察。係本國派點在澳。所有奉公接應。及與華夷交涉事件。稟訴呈詞。

俱由經理當有權握自後如有稟呈地方官
不爲申理者准其直達大憲庶下情不致枉
屈而在澳華夷猶知畏敬等語據府廳查覆
澳夷向來遇有稟陳事件俱由地方官代爲
轉稟各憲示遵至華夷交涉事件向例亦由
委叻以據呈地方官准理現在並無屈抑情
事應請嗣後如果地方官有不爲准理之事
固應准其直達大憲倘並未稟呈地方官而
直行越訴者應卽照民人越訴不准之條辦

理

一據稟上路來澳各處貨物以及日食所資前
因海道未靖其水腳稅務較前加倍以致貨
殖高昂華夷日用維艱據府廉查覆澳門地
方貨殖均由省垣佛山各處市鎮轉運到澳
售賣價值隨時長落並無一定嗣後凡民夷
買食均照市價公平交易毋庸立定章程

一據稟澳夷生齒日繁人多屋少竟至失所無
依求恩奏請准行新建至各工匠稟報批牌

飭定章程如係舊屋重修免其稟報據府廳
查覆澳夷房屋廟宇止准修葺壞爛不得於
舊有之外添建一椽一石違者以違

制論罪嘉慶十二年據夷官嗟嗽咳具稟業經會
議應永遠遵守未便更張至夷屋壞爛許其
復修向來該承修工匠先將應修處所繪圖
稟報以杜添進之弊自應照舊稟報以便稽
查地方官如果查明別無情弊立即批准給
修不得假於書役之手以杜浮費而垂永久

一據稟澳夷買辦既經點驗鄉民誠實者給領牌照免其改換新牌不致串通衙差弁役藉端需索據府廳查覆夷人買辦嘉慶十四年奏准章程凡夷人買辦著令澳門同知選擇土著殷實之人取具族鄰保結始准承充給予腰牌印照以便稽查代買違禁貨物及勾通走私之弊應飭上緊招募選充將花名冊冊申送以憑傳驗查此項人役如係承充之後或欲別業稟退以及病廢事故需人接充

應令其將牌繳銷改換新牌以杜私充滋弊
其牌務令當堂發給不得假手胥役以免需
索

一據稟澳夷上省下澳及澳中華夷搬運貨物
應用挑夫動以公務爲詞藉端需索每致留
難阻滯卽夷人自有黑奴搬運家私移頓貨
物實可無庸雇倩者竟有攔街毆奪起釁爭
端屢稟地方官嚴加究治伊等頑抗異常據
府廳查覆澳中挑夫設有夫頭每逢渡船往

來承挑貨物及夷人上省下澳均須雇倩近
因米價高昂各夫頭因日用不敷未免腳價
比前較增應請飭禁不許多索至黑奴搬運
家私什物應聽該夷人自便挑夫倘有攔阻
混爭地方官出示查禁有犯卽行究處

以上各條經粵海關監督廣州府澳門同
知循照舊章覈議內如洋船澳房不能添
設澳船稅鈔歷有定規未便更張白鉛祇
能照依定數憑行赴佛山填照向買未便

分給三千聽西洋夷人在澳裝運其餘各條或原有禁例或日久恐滋流弊應如議遵循辦理

廣東布政使曾煥會議詳駁啖咭喇國大

班啖啖啞議

嘉慶十五年十月

一稱伊等辦理貿易遇事遞稟若必用夷字恐致譯錯誤事據該府等議以內地稟事悉用漢文繕寫事由本係

盛世同文之義因外夷不識漢字是以准用夷字係

屬格外體恤今該夷商等情願學寫漢字似
於書同文之義尙無妨礙卽向來夷稟亦多
用漢文請俯順夷情准其稟事時書寫漢文
本司道等議查夷性謫正不一恐致勾引內
地民人代爲書寫如遇有語涉荒謬一經查
究則又以不諳漢文倩人代寫爲推卸地步
不可不防其漸應請嗣後如該大班能寫漢
字准其自書若本不諳習仍用夷字免致狡
混而杜弊端

一地方官行用文書諭內用蠻夷等字似有輕侮之意府議以蠻夷二字係外國統稱在南曰蠻在西曰夷猶內地民人曰漢人祇係稱呼並無輕侮之意况澳門係香山縣地方各國夷人往來貿易遇有交涉事務不能不由地方官就近查考豈可推敲字句請毋庸謹奉司道等查此係夷目等不諳文義應如該府等所稟稱毋庸置議並請飭知洋商明晰開導示以並非輕侮以釋其疑

一地方官若有事至行請先爲通知府議地方官赴行查察係爲防範內地匪民慮有擾累外夷之事本無可疑先爲通知亦屬兩便並無窒礙本司道護准地方官有公事前赴洋行查辦本非祕密原可預先通知以示推誠布公之道應如所請辦理

一公司船戶有事駕三板來往關口巡役請無攔截府議以夷船旣准貿易自應准其遇事往來關口巡役查看往來船隻事隸關部請

移咨查照舊章辦理本司道議准公司船戶
遇有公事似可准其坐駕三板往來由粵海
關查照向例辦理倘有攜帶違禁貨物仍須
由各關口查辦以示體制而免疎虞

一夷商來粵貿易須用民人爲挑夫守門所用
不下數百丁若用夷人恐與小民爭執府議
以十三行及澳門公司館內向來雇用挑夫
守門燒茶煮飯買物等項人等均不可少請
照舊章准其雇用惟跟班沙文向例並未准

行請照舊章禁止本司道議准挑夫守門人
等若一概禁止該夷人來粵貿易未免不能
熟悉自應仍准雇用惟省城十三行及澳門
公司館每處需用若干名應請核知粵海關
酌定名數飭行遵照俾易稽覈其沙文名目
仍應嚴行禁止

一 愿來護送貨船來粵之兵船在川鼻交椅零
丁雞頸等洋面灣泊因乘風時便難常在一
處請照常給買辦一節府議以巡船護送貨

船往來粵省向有一定灣泊地方業於嘉慶
十年三月經總督那彥成具奏在案自應照
舊章辦理但護送貨來卽當護送貨往若貨
船已經回國巡船卽不得逗遛外洋致廢他
國夷商口實請嗣後叻咭喇巡船准令照舊
護送貨船往來貨船未經回國以前准其給
與買辦若貨船已經回國巡船卽不得逗遛
外洋以符舊例本司道議准貨船在外洋來
粵惟祖家船有兵船護送此係該國慎重之

意並未禁止但兵船灣泊例祇准在外洋地方不得逼近內洋自應仍照舊章一俟祖家貨船貿易事竣回國卽應普同護送回帆不得逗遛亦不准再給買辦如此立定章程巡船自不能任意灣泊

一貨船在內巡船在外不得以三板往來相通求禁止關口師船攔截府議以巡船三板與貨船三板往來關口斷難一一辨識稽查之法惟論有無違禁夾帶情弊請嗣後喚咭

喇貨船進口後如有送信三板往來在內出
者赴省城稅館黃埔稅館報驗在外入者赴
橫檔稅館報驗驗明並無軍械私貨由稅館
給與照票知會附近師船礮臺准予放行不
必禁阻其有違禁夾帶者照例阻止本司道
議准貨船駛入內河巡船祇准在外洋停泊
如有三板往來似未便全行禁止然遇有出
入各關口稅館必須嚴查如無違禁貨物軍
械給予照票始准放行如查有弊混仍行阻

止則以體恤之中仍寓防閑之意似可准行
一前日有港脚船出口已得紅牌被師船放礮
向擊求定章程禁止府議以貨船已領紅牌
自應放行不可阻止但該船已赴稅館報明
稅口亦應就近知會礮臺方知何船出口以
憑轉報請嗣後貨船領牌出口由稅口知會
礮臺弁兵可免歧誤本司道議准貨船出口
既已領牌自應卽由稅口隨時知會礮臺驗
放以免阻止致滋紛擾

一咪喇哩國與暎咭喇國不睦所有暎咭喇貨
船常被咪喇哩在夷洋拏獲其掠過貨物亦
不容隨便售賣府議以各國船隻來粵貿易
均有原領各國批照可據是以船至萬山須
用引水看過船隻實有貨物開明來歷始赴
澳門掛號掛號後引至虎門報驗方始引進
黃埔舊例相循已久若驗明既係貨船又有
批照另於舊例外別生枝葉便易滋擾請仍
照舊章辦理至夷洋有無夷船互相等執內

地無從查考應毋庸議本司道議准查各國
貨船來粵惟以該國批照爲憑其貨物來歷
本難稽考至該夷人等互相爭執係外夷之
事不值顧問應毋庸置議

廣州府知府陳鎮靈嘆咭喇國大班唸咭

啞議 嘉慶十五年十月

一嘆咭喇夷商稟帖准用漢文係爲俯順夷情
遇事方便起見如款式語句不合應駁換再收其
有關陳奏事件請仍用夷字以符體制

一 嘆咭喇夷商稟事密封交行商代遞係指緊要事務徑赴總督轅門陳訴者而言其尋常貿易事務請仍赴粵海關衙門呈遞以及交涉地方尋常事件仍赴澳門同知香山縣及縣丞衙門就近呈遞以昭畫一

一 各國夷商來粵貿易統歸粵海關衙門經營其有交涉地方事務在澳門者歸澳門同知香山縣及縣丞經營在黃埔者歸番禺縣及菱塘司巡檢經營立法最爲簡便惟嘆咭喇

向有護貨兵船是以師船礮臺亦須隨時查考此次議定章程凡出入送信小三板船隻均赴稅口掛號查驗給與照票如果該夷目等約束嚴緊請由稅口知會就近礮臺放行但不得稍滋事端致違

天朝一視同仁之意

一大班噍咻啞等在粵貿易係受啖咭喇國王委任其具稟大小事件與內地辦公無異斷無以私廢公之理請嗣後夷商稟事但論其

事之應稟不應稟不問其船之開槍與不開
船卽有遲延亦係伊等自誤其事毋庸查問
如此則浮言可息夷情益覺安帖

一內地辦理犯法民人本與外夷無涉而以訛
傳訛最易煽惑請嗣後辦案如有交涉外夷
之處必先有文書飭行公司館查照如無文
書卽不干外夷之事該夷商等無須詢問

兩廣總督蔣攸銛監督祥紹疏

嘉慶十九年十月

查南洋諸夷以暎咭喇爲最強而並非富饒惟

藉貿易爲資生之計其貨物不到內地亦別無
銷售之處且呢羽鐘表中華儘可不需茶葉土
絲彼國斷不可少是其不能不仰給於貿易者
其理易明惟是懷柔駕馭必當杜漸防微粵民
趨利若鶩首在查禁漢姦近年如私借夷人貲
本及拖欠夷債之鄭崇謙吳士瓊沐士芳等均
經照例懲辦現復訪有曾爲夷人服役積有家
產朦捐職銜仍與夷人交結之李耀李懷遠二
名業經拏獲查鈔審明定擬具奏在案臣等仍

督飭地方官密加偵訪如有似此者均應逐一嚴懲並不准民人私爲夷人服役責成洋商通事稽查其住居澳門及省城十三行之貿易民人不得搭蓋夷式房屋卽售賣夷人衣履之舖戶亦不得用夷字店號以杜勾通而嚴區別向來兵船護送貨船到粵貨船自行進口兵船卽駛往零丁潭仔洋面停泊嘉慶十四年原奏但稱不許進十字門及虎門各海口語涉籠統嗣後應仍其舊不得駛入內洋亦不准於所護貨

船出口之後復有逗遛致干驅逐至設立洋商
令其互相貿易卽藉以稽察夷情必須身家殷
實辦事明妥交易始能公平不欠夷人私債庶
不致爲夷人所輕視邇來充當洋商者共有十
人實在貲財素裕者不過三四家其餘雖皆有
同商互保承充而本非殷實不過圖得行規承
充後又不善經理無處揭借不能不欠夷人之
帳既有夷帳卽不能不賒客商之貨以抵還夷
人迨至積欠逾多不敷挪掇爲夷商所挾制是

以評估貨價不得其平內地客商轉受虧折之
累若俟該疲行陸續乏敗時再行清理恐有積
重難返之勢向例貨船出口海關監督衙門發
給印照回國卽取具夷人兩無帶欠夷字甘結
存案此事竟成故套難以憑信臣等再四熟商
俟冬春交易事畢派委明幹大員督飭總商伍
敦元盧棣榮確查各商私欠夷帳多寡如爲數
有限易於歸結者勒限清完准其承充外倘拖
欠過多不肯據實供吐卽應奏明斥革將承辦

貿易行規歸於殷商分辦仍照向辦章程查鈔
變抵不敷之數令眾商按股攤還現在各商已
有代還之款應俟攤完後分年續攤並飭此後
不得濫保身家淺薄之人違者一體治罪如此
則夷人不能擡價居奇以挾制洋行洋行亦不
敢低估侵欺以拖累商價且夷帳既已清釐每
年貨船回國卽有未售完之貨可交住澳門大
班等料理或酌留數人亦屬無多仍嚴禁內地
民人不准私往夷館庶立法益臻周密而弊端

可期剔除

兩廣總督李鴻賓監督中祥疏

道光十一年二月

粵東省會濱臨洋海番船往來防察最宜周密
乾隆年間因暎咭喇國夷商違犯

天朝禁令經前督

臣

李侍堯奏定防範外夷章程五

條用資約束迨日久玩生漸形疎畧道光九年
暎咭喇夷商因求減輸規銀延不進口上年又
有私帶番婦住館偷運鎗礮至省等事雖一經
具奏該夷卽知悔悟不致始終抗違但夷情詭

謫必須嚴申禁令以重防閑且舊定各條今昔情形不同亦有因時異宜之處應酌量變通俾可其相遵守臣等率同藩臬兩司將原定章程參酌時勢量爲增減責令員弁兵役實力巡防行商通事認真稽查嚴內地之成規卽以杜外夷之滋事似於控馭綏來之道益加周密謹會同核議章程八條敬呈

御覽

一夷商進口後泊船處所應照舊派撥弁兵稽

查其住居行商館內卽令行商約束以免滋事也查原定章程夷船進口收泊黃埔地方酌撥廣協外委一員帶兵十二名搭寮防守併於督標內揀派候補守備一員督同稽查復於附近之新塘營酌撥柴船一隻與該處原設左翼中營槳船會同稽查俟夷船出口卽行撤回等因現在毋庸另議更改惟是日久視爲具文應隨時密加訪查如巡兵怠惰偷安卽行分別嚴懲至夷商寓歇洋商館內

向係責成行商管束其置買貨物必令行商
經手原以防範姦民引誘教唆嗣後夷商居
住行商館內不許夷商擅自出入致與姦民
交易營私其在省河坐駕三板船隻不准揚
帆飛駛與省河民船碰撞爭鬧凡附近省城
村落墟市不准聽其遊蕩以杜釁端

一夷人私帶番婦住館及在省乘坐肩輿均應
禁止也查各國夷人帶婦婢至省居住久經
嚴禁乃上年暎咭喇國大班違例帶攜已驅

逐回澳訪察來省之婦係屬該夷商由本國帶來其隨從夷婢則係澳門居住之西洋婦女受雇服役嗣後應嚴諭各國大班夷商不許攜帶夷婦至省居住倘敢故違卽停其買賣並卽押令回澳一面責成關口巡查弁兵如遇夷人攜帶婦婢赴省卽行攔阻截回又飭澳門同知轉諭澳門西洋夷目唎嚒哆及番差等此後西洋婦女受雇與各國夷婦服役只准在澳門居住不准違禁聽其隨帶赴

省如違惟嗚噪吵是問至夷人在省坐轎皆因姦徒送給及肩夫貪利所致除諭飭各國夷人遵照嗣後不得在省乘轎上岸外併嚴禁姦商不得給送肩輿代雇與夫及受雇肩攬希圖獲利一經訪聞卽嚴拘究治

一夷人偷運鎗礮至省應責成關口巡查弁兵嚴加禁遏也查夷商在省不准帶攜鎗礮禁令本屬森嚴乃上年忽有夷人偷運鎗礮載至省城夷館殊違舊制嗣後應責成關口巡

查弁兵認真訪察遇有夷人偷運鎗礮赴省垣夷館卽行攔截不准前進若弁兵失於覺察甚或知情放縱致夷人復有偷運鎗礮至省之事卽提該弁兵人等分別究擬

一夷商雇倩民人服役應稍變通也查原定章程夷商住居館內除設立買辦通事外如民人受雇服役者嚴查禁止等因查內地民人雇給夷商服役向有沙文名目久已禁革自應仍照舊章嚴行禁止惟近日各國夷商來

者益取其看貨守門及挑水挑貨等項在在
需人而夷商所帶黑鬼奴性多蠢暴若令其
全用黑鬼奴誠恐聚集人多出外與民人爭
擾轉致滋生事端應請嗣後夷館應需看貨
守門及挑水挑貨人等均由買辦代爲雇倩
民人仍將姓名告知洋商責成該管買辦及
洋商稽查管束如此等民人內有教誘夷商
作姦洋商買辦卽隨時稟請拘究

一 夷商具稟事務應酌量是否緊要分別代遞

自遞也查夷商稟詞應否交行商代遞抑應
自行投呈必須明定章程方免混行越訴應
諭飭喚咭喇與各國夷商遵照嗣後遇有事
關緊要必須赴總督衙門稟控者應將稟詞
交總商或保商代遞不准夷人擅至城門口
自投倘總商保商執意攔阻不爲代遞致夷
情不能申訴方准夷人攜稟前赴城門口營
員接交其投稟時只准一二夷人前往不准
帶領多人張皇其事若事屬尋常行商並未

攔阻不爲代投及不應具稟之事該夷人輒
行逞刁違抗帶領多人至城門遞稟者卽將
該夷商貿易暫停一月不准買賣貨物以示
懲儆其餘尋常貿易事務應赴粵海關衙門
具稟及尋常交涉地方事務應赴澳門同知
香山縣及香山縣丞等衙門稟陳者均仍准
照常控理

一借貸夷商銀兩應杜拖欠弊端也查原定章
程商民違禁借貸夷商銀兩申引勾結者照

交結外國借貸誑騙例問擬所借之銀查追
入官等因是行商借貸夷商銀兩舊章久爲
嚴密惟行商與夷商交易有無拖欠尾項向
於夷商出口時虛報了事不足以昭覈實而
杜朦隱應請嗣後除商民借貸夷商銀兩申
引勾結者仍照例究治外其行商與夷商交
易每年買賣專畢令夷商將行商有無尾欠
報明粵海關存案各行商亦將有無尾欠據
實具結報明粵海關查考如有行商虧本歇

業拖欠夷商銀兩查明曾經具報者照例分
賠未經報明者卽不賠繳控告亦不申理所
有應償尾欠銀兩應飭令行商具限二箇月
內歸還不准延宕如已歸給卽取具夷商收
字報明存案若逾期不償許該夷商控追倘
逾期該夷商不願控追應聽其便其當時不
控過後始行控追者不爲申理以杜新舊影
射之弊

一夷商不得在粵住冬應變通舊章隨時防範

也查原定章程夷船五六月間在粵收泊九月間回國不得留寓省城探聽物價置買獲利及與內地民人往來交接魚緣爲茲如有行貨未清情願暫留澳門居住者聽其自便等因乾隆年間各國夷船至粵不過三四十號今則多至七八十號至百號不等近年映咭喇國公司夷船每於七八月間陸續來粵換兌貨物至十二月及次年正二月內出口回國該國公司大班夷商人等於公司夷

船出口完竣之後請牌前往澳門居住俟七
八月間該國貨船至粵該大班人等復請牌
赴省料理貿易此外港脚咪啞各國夷船
至粵生理來去並無定期非嘆咭喇之有公
司者可比其一人名下每年至粵船隻或一
二號或三四號或本人無船將貨物附載別
船售銷該夷商均在省經理是現在夷船既
倍多於前而收泊之期復無定且其在粵經
理商務年久相安自不必拘定以九十月間

回國嗣後夷商如果早抵省城貨物全銷仍
令照舊按期返棹倘遲至八九月開始行到
粵售貨需時應責成各行商將住省夷商認
真稽查約束一面公平售貨迅速兌價不得
拖欠指延各國夷商一俟貨銷事竣不論何
時卽行隨船回國或前往澳門居住不得無
故潛留如此量爲變通則遠夷均無久滯省
城之事而姦民亦鮮藉端勾引之弊矣

一嘆咭喇國公司船戶駕艇往來及夷商貨船

領牌出口均應遵定制也查夷船貿易其公
司船戶遇有公事往來坐駕三板艇隻自難
禁止應照舊准其駕駛倘有攜帶違禁貨物
卽著落各關口弁兵嚴查稟辦惟向來夷目
船戶始准坐駕插旗三板船隻若非夷目船
戶不得妄駕插旗之船仍應循照舊章俾無
朦混其由澳門黃埔至省及由省至黃埔澳
門均照舊章請給紅牌毋得來去自由致干
查究至夷商貨船領取紅牌出口向赴稅館

報明仍應由稅口隨時知會環臺驗放免致
攔阻滋鬧

兩廣總督盧坤疏 道光十四年十月

嘆咭喇與內地通市誠如

上諭必須有統攝之人專理其事而經理又必須經
紀中人如從前之大班等項方可與內地洋商
交易臣已飭洋商伍敦元等傳諭該國散商寄
信回國另派大班來粵管理貿易事宜以符舊
制不得仍令夷目前來致如嘩勞啤之徒生事

端有礙貿易現復恭錄

諭旨飭商傳諭欽遵

兩廣總督盧坤監督中祥疏

道光十五年正月

竊外洋夷人來粵貿易自乾隆二十五年奏定防範規條以後嗣於嘉慶十四年道光十一年經各前督撫臣先後酌議章程奏准遵行立法已屬周密第奉行日久或竟成具文或漸生流弊上年啖咭喇公司局散該國商人自來貿易司總無人雖經諭飭該夷商等寄信回國仍派

大班來粵管理而現在商多人雜事無統屬必
應頒發章程俾資遵守唯時事有今昔之殊且
英夷公司既散貿易情形與前亦稍有不同除
舊章無須更議各條照舊申明曉諭並將查辦
夷欠嚴拏走私各章程先經專案具奏外尙有
應行酌量增易規條經臣等率同藩臬兩司詳
加籌議肅體制以防踰越嚴交結以杜漢姦謹
出入之防專稽察之責庶防範益昭詳慎仍嚴
飭洋商公平交易各顧大體俾諧番共沾

聖澤咸凜畏懷

一外夷護貨兵船不准駛入內洋應嚴申禁令
並責成舟師防堵也查貿易夷人酌帶兵船
自護其貨由來已久向例止准在外洋停泊
俟貨船出口一同回帆不許擅入海口自嘉
慶年閒以來漸不恪守舊章上年又有闖入
海口之事雖該夷船駛入內河淺水之處毫
無能爲而防範總應周密除虎門一帶礮臺
現在分別增建移設添鑄大礮籌備堵禦外

應嚴申例禁嗣後各國護貨兵船如有擅入
十字門及虎門各海口者卽將夷商貨船全
行封艙停止貿易一面立時驅逐並責成水
師提督凡遇有外夷兵船在外洋停泊卽督
飭各礮臺弁兵加意防範並親督舟師在各
海口巡守與礮臺合力防堵弁兵倘有疎懈
嚴行叅處務使水陸聲勢聯絡夷船無從闖
越

一夷人偷運鎗礮及私帶番婦番哨人等至省

應責成行商一體稽查也查夷人除隨身攜帶刀劍鎗各一件例所不禁外其擅將礮位及鳥鎗軍械並番婦人等運帶赴省定例責成關汛弁兵稽查攔截唯關汛固有盤查之責而夷商在省外夷館居住其房屋皆係向行商租賃該商等耳目切近斷無不知自應一體責令稽查嗣後各國夷人概不准將鎗礮軍械及番婦番哨人等運帶至省如有私行運帶者責成租館行商查阻不許令其入

館一面赴地方官呈報如有容留隱匿即將該行商照私通外國例治罪關汛弁兵不行查出仍分別失察故縱從重究處

一夷船引水買辦應由澳門同知給發牌照不准私雇也查澳門同知衙門向設引水十四名遇夷船行抵虎門外洋應報明該同知令引水帶引進口其夷商在船所需食用等物應用買辦亦由該同知選擇土著殷實之人承充近來每有匪徒在外洋假充引水將夷

人貨物誑騙逃走并有匪類詭託買辦之名
勾串走私等弊追事發查拏因該匪徒詭託
姓名無從緝究嗣後澳門同知設立引水查
明年貌籍貫發給編號印花腰牌造冊報明
總督衙門與粵海關存案遇引帶夷船給與
印照註明引水船戶姓名關汛驗照放行其
無印花腰牌之人夷船不得雇用至夷船停
泊澳門黃埔時所需買辦一體由該同知給
發腰牌在澳門由該同知稽查在黃埔由番

民縣稽查如夷船違例進出或夷人私駕小艇在沿海村莊遊行將引水嚴行究處如有買賣違禁貨物及偷漏稅貨買辦不據實稟報從重治罪

一夷館雇用民人應明定限制也查舊制貿易夷人除通事買辦外不准雇用民人道光十一年奏准夷館看守門戶及挑水挑貨人等均由買辦代雇民人惟愚民驚利鮮恥且附近省城多諳曉夷語之人若聽夷人任意雇

用難免勾串作姦自應定以限制並宜專以
責成嗣後每夷館一開無論住居夷人多寡
祇准用看門人二名挑水夫四名夷商一人
雇看貨夫一名不許額外多用其人夫責成
夷館買辦代雇買辦責成通事保充通事責
成洋商保充層遞箝制如有勾串不法唯代
雇保充之人是問仍令該管行商按月造具
各夷商名下買辦人夫名籍清冊送縣存案
隨時稽查其挑貨人夫令通事臨時散雇事

畢遣回至民人受雇爲夷商服役之沙支名目仍永遠禁止倘夷人額外多雇人夫及私雇沙支服役將通事行商一併治罪

一夷人在內河駛用船隻應分別裁節並禁止不時閑遊也查夷人入口貿易貨船停泊黃埔其在省城澳門往來向惟嘆咭喇公司船戶准坐駕插旗三板船隻此項三板船身較大上有艙板易於夾帶器械及違禁貨物現在公司已散所有插旗三板船應行裁革至

夷人在夷館居住不准擅自出入嘉慶二十
一年前督臣蔣攸銛任內酌定每月初八十
八二十八三日准其附近遊散一次近年該
夷人往往不遵舊章必須重申禁令嗣後各
夷人船到黃埔或在省城澳門往來通信祇
准用無篷小三板船不得再用插旗三板船
隻其小三板經過關口聽候查驗如有夾帶
違禁貨物及礙位器械卽行驅逐在館居住
夷人祇准於初八十八二十八三日在附近

之花地海幢寺散遊一次每次不得過十人
限申刻回館不准在外住歇飲酒如非應准
出遊日期及同遊至十人以外並赴別處村
落墟市遊蕩將行商通事一併治罪

一夷人具稟事件應一律由洋商轉稟以肅政
體也查外夷與中華書不同文其中閉粗識
漢字者亦不通文義不諳體制具稟事件詞
不達意每多難解并妄用書信混行投遞殊
乖政體且同一夷務或由洋商轉稟或由夷

人自稟辦理亦不畫一嗣後凡夷人具稟事
件應一概由洋商代爲據情轉稟不必自具
稟詞如係控告洋商事件或洋商有抑指不
爲轉稟之事仍許夷人自赴地方官衙門稟
訴立提洋商訊究

一洋商承保夷船應認派兼用以杜私弊也查
夷船來粵舊例係由各洋商循環輪流具保
如有違法唯保商是問嗣恐輪保有把持之
弊凡港脚夷船均聽其自行具保惟現在公

司已散所來夷船散漫無稽若責令仍照舊
例由洋商輪保恐有抑勒之弊而竟任其自
行擇保亦難保無勾串情事嗣後夷船到粵
照舊聽其自投相信之行爲認保一切交易
貨物請牌完稅公事均由認保承辦收納餉
稅查照則例毋許絲毫加增仍每船設立派
保一人各行換次輪派專司查察如認保行
商與夷人通同舞弊作姦或私增稅銀拖欠
夷帳責成派保之商據實呈首分別究追派

保徇隱察出並究

一夷船在洋私賣稅貨應責成水師查拏並咨沿海各省稽查也查各國夷船販運貨物來粵理應入口完納稅鈔由洋商發賣乃該夷船等往往寄泊外洋進口延緩亦有竟不進口旋即駛去者不特躉賣鴉片並恐私銷洋貨臣等每據稟報卽嚴切批行舟師催令進口如不進口立時驅逐不准逗遛並在各海口分派員弁嚴拏走私匪徒歷經拏獲出洋

販賣鴉片人船究辦惟粵省與福建浙江天津等省洋面毘連各省姦徒坐駕海船在外洋與夷人私相買賣貨物卽從海道運回此等姦販既不由粵省海口出入無從堵擊而洋貨分銷入口漸少於稅餉甚有關係嗣後應責成水師提督督飭舟師在於外洋常川巡邏如有向夷船私買洋貨商販卽行擊解究辦並立定章程無論何省海船置買洋貨一律赴粵海關請用蓋印執照詳註貨物數

目不准私買咨明閩浙各省通行遵照並於
各海口嚴行稽查如有海船運回外洋貨物
查無海關印照卽屬私貨照例究辦船貨入
官

粵海關志卷二十九終